

Pruuta (vaccin) uutta inflyensaa vasthaan

Tornedalsfinska

Olet nyt saanu pruitan uutta inflyensaa A(H1N1) vasthaan. Tästä saatat lukea mitä se tarkoittaa ja mihin kääntyä jos sulla on enämpi kysyttävää.

Inflyensasta A(H1N1)

Inflyensa A(H1N1) oon niin sanottu pandeeminen inflyensa, joka leviää koko mailmassa. Kelhään ei ole ollu juuri tätä inflyensaa ennen ja uskottavasti juuri kukhaan ei ole sille imyyni. Sen takia paljon useamalla oon riski saa sen ko vertaa tavalisheen säsongi-inflyenshaan.

Symtoomia oon esimerkiksi feeperi, yskä, nuha, kurkkukipu ja pään- ja lihassärky. Useasti olet väsyny, joskus oksinat ja vatta pehmenee (diarré). Symtoomit menevä yli jossaki viikossa. Joilaki ihmisillä, niinku oottavat äitit ja net joila oon kruuninen syän- eli keuhkosiukkuus, oon riski tulla vakavasti siukaksi ja saa jälkisiukkuuksia, niinku keuhkokuuhmeen.

Mitä kropassa tapahtuu ko annethaan pruita?

Ko pruita annethaan, annethaan osa semmosta inflyensaviirystä joka ei ole aktiivi, ja jota krooppa saattaa käyttää ette rakentaa inflyensasuojan. Se ei riitä siihen ette tullee siukaksi, mutta riittää suojan rakentamisheen (imyniteetti). Jos myöhemin saapi tartunan, kroman imyynisuoja oon jo etukätheen aktiveerattu kohtaahmaan inflyensaviiryksen ja se saattaa tuhota tartunta-aiheen kierästi, eikä silloin tule siukaksi.

Minkä suojan inflyensapruuta A(H1N1) antaa?

Pruuta Pandemrix, joka annethaan uutta inflyensaa A(H1N1) vasthaan, antaa 90-prosenttisen suojan inflyensan tarttumiselle. Eli kaikki jotka saava pruitan, ei saa täyelistä suojaa, mutta jos monet ottava pruitan, saattaa

kuitenki välttää ette net harvat jotka ei ole saahnee täyelistä suojaa, saava inflyensan.

Saattaakos sitä saa sivuvaikutuksia?

Niinku kaikista lääkkeistä, Pandemrixistä kans saattaa saa sivuvaikutuksia, mutta ei niitä kaikile tartte tulla jotka ottava pruitan. Maholiset sivuvaikutukset katoava usseimiten 1-2 päivässä ilman hoitoa. Ota yhteyks siukka-hoijon kans jos pitemphään oon sivuvaikutuksia, eli jos saat sivuvaikutuksia joita tässä ei mainita.

- Rohki tavaliset (nähhään vähhiinthään 1:lä kymmenestä pruitan ottanheista): kipua, punastumista, paisumista siinä mihin pruita annethiin eli se paikka kovettu, päänsärkyä, väsymystä, feeperiä, lihas- ja nivelsärkyä.
- Tavaliset (nähhään vähhiinthään 1:lä saasta pruitan ottanheista): paikka johon pruita annethiin tuntuu lämpimältä, sitä kutistaa eli siihen tullee mustelma, hikkoilu lissäintyy, vilustaa, inflyensaa muistuttavia symtoomia, rauhaset (körtlar) paisuva kurkussa, kinalossa eli nivuksissa (ljumske).
- Ei niin tavalisia (nähhään vähhiinthään 1:lä tuhanesta pruitan ottanheista): käsissä eli jaloissa pistelee, net puutuva, väsymystä, huimausta, vatta pehmenee, oksenuttaa, vattankipua, siukkanen olo, kutistaa, tullee näppyjä (utslag), ei saata nukkuu.

Halvaks enämpi tietoja?

Praati sen yksikön (enhet) kans jossa sait pruitan eli soita 1177 Siukkahoito-neuonthaan eli oman landstingin siukkahoito-neuonthaan. 1177 Siukkahoito-neuonthaan pääsee soittamalla numehroon 1177 eli webpaikasta www.1177.se.

